

晚

晴

移

詩

匯

晚晴移詩匯卷九十四目錄

吳鎮 二十二首

謝震 十首

周光裕 一首

鰲圖 四首

紀曾藻 二首

邵颿 二首

田均晉 四首

張雲璈 七首

張鶴 二首

萬廷芮 二首

鄭洛英 一首

劉塏 二首

和瑛 十二首

馬慧裕 一首

邵晉涵 七首

錢澧 十七首

林澍蕃 十二首

吳俊升 一首

程晉芳 十三首

龔大萬 一首

孔繼涵 四首

李長庚 一首

方昂

三首

陳昌齊

三首

龔景瀚

七首

洪樸

四首

常紀

一首

楊懋珩

二首

晚晴移詩匯卷九十四

徐世昌

吳鎮字信辰號松厓狄道人乾隆己丑舉人歷官沅州

知府有松花庵詩草

牛空山曰余官西陲十年從吾游而能學吾之爲詩者得一人曰臨洮吳鎮其言曰古期漢魏近體期盛唐合而衷諸三百篇師其意不師其體鎮誠狂者然其用意亦健矣袁子才曰余見江甯尉王柏厓詩頗不類近人問所從學乃知有松厓先生楊蓉裳牧雲川寄松厓集來采入詩話以備秦風一格其詩妙萬物而爲言於唐宋諸家不名一體可謂集成惟集中有乾蝴蝶詩聯篇累帙古名家所不爲又曰唐高駢節度西川調廣陵詠風箏云依稀似曲才堪聽又被風移別調中松厓官山左調楚詠懷云阿婆經歲撫嬰孩飢飽寒暄總費猜才得呱呱眞痛癢家人又報乳娘來兩意相同余雅不喜陳元禮逼死楊妃過馬嵬云將軍手把黃金鉞不管三軍管六官松厓句云桓桓枉說陳元禮一矢何曾向祿山亦兩意相同王西莊曰三秦詩派稱盛如孫豹人李天生王幼華王山史諸公未易更僕數余宦游南北得吳子

信辰之詩

歎其絕倫

詩話關中詩人盛於國初而隴外較遜至乾隆間松

厓崛起與秦安胡靜庵並執騷壇牛耳靜庵詩尙

樸健名位未顯松厓則才格並高研求聲律故其詩

音節尤勝歸林下後學教蘭山書院裁成後進頗有

繼起者當爲西

州詩學之大宗

葛衣公祠

明史作河西傭又一作補鍋匠建文時逸

遺命火灰其骨俟西南風至揚之魯家如其言祠

在今平番縣以華亭包節陪祀節亦明御史以直

諫謫平

番者

江南杜宇影飄瞥萬里滇蜀嘯不絕羣鳥相從羽毛折夜

夜三更口流血葛衣老子爾何人十年飽噉松山雪問之

不答姓與名仰天長嘯中如結乞食來往金城市補鍋鋸

笛手皴裂相逢河西魯朱家杵臼訂交詎親切堂上擊筑

堂下吟矐目傭人泣幽咽遺骨不歸中原土西南風至煙

灰滅允吾古祠薦松肪鐵面梗裔陪俎列弔客莫歎葛衣
單海枯石爛臣心熱

題哥舒翰紀功碑

李唐重防秋哥舒節隴右浩氣扶西傾英名壯北斗帶刀
夜夜行牧馬潛遁走至今西陲人歌詠徧童叟漁陽烽火
來關門竟不守惜哉百戰雄奸相坐掣肘平生視祿山不
值一雞狗伏地呼聖人茲顏一何厚毋乃賊妄傳借以威
其醜不然效李陵屈身爲圖後英雄值老諄天道邁陽九
終焉死偃師曾作司空否轟轟大道碑湛湛邊城酒長劍
倚崆峒永與乾坤久

候馬亭歌

漢武望馬如望仙恨無桂館通祁連汗血千載化龍去至

今候馬空亭傳空亭一望連沙草極目長天但飛鳥君不見子卿憔悴少卿愁英雄盡向鹽車老

范烈女歌

女三原農家子已字人將笄矣而其父與婿家皆貧值歲歉議更嫁之女遂赴水死

事在乾隆

十五年

范烈女生何許乃在嵯峨之南涇川之潄天不可移父難忤曲池水清兒心苦白蓮夜深作人語下有鴛鴦嘯匹侶吁嗟女兮哀千古

昭陵懷古

大風起九嶷慘澹昭陵日黃土闕元宮內有龍鳳質伊昔隋氏亂文皇乘時出揮劍掃浮雲有如鷹隼疾論功褒鄂小造意劉裴失惜哉更衣孽仙李幾不實么麼崔乾祐敢當黃衣叱陰兵鞭石馬汗血晝流溢茫茫升遐地俯仰意

蕭瑟何世無英衛白頭卧蓬草

華嶽

二華雄關右三峯插斗杓彈冠司寇肅抵掌巨靈驕日月
相遮隱風雷自沆寥金神秋執鉞玉女夜吹簫帝座鉤梯
接天門箭括遙船開花十丈雪挂瀑千條客偶談禽向予
因訪偃蒼龍森欲動白鶴似曾邀仙醞留人醉雲衣作
蝶飄攜詩慚謝朓作霧晒張超山鬼投秦壁村巫憶漢燎
甯知王景略絃誦雜漁樵

鞠歌行

倚劍望八荒不知何故忽悲傷黃雲萬里無斷續中有古
時爭戰場英雄一去不復返摧頽白骨歸山岡而我徒爲
生六翮憔悴不復能飛揚君不見流光迅速如驚電壯士

一夕毛髮變

蟲蛇不在井豺虎不在堂枳棘不在路崇厲不在場胡爲
勞我軀年年去故鄉故鄉此日好風色雛雞呶呶桑榆側
欲憑遠夢赴鄉關坐歎行吟眠不得君不見狐死必首邱
依依桑梓令人愁試看淩煙古圖畫誰哉蕩子曾封侯

黃金臺

驚風走急沙孤臺鬱突兀中有千古意立馬不能發燕昭
昔下士黃金堆日月始隗卒收功大道留殘碣夕陽過客
盡崦嵫浮雲沒把酒酹望諸悲歌動林樾茫茫紅塵內驚
蹇競起忽生駿尙難求何由別朽骨

反招隱

太古不往來九州一村落巢由競買山何處容猿鶴君但

隱其心金門有邱壑

太元洞懷古贈張孝廉南峯

唐孫思邈
隱居處

阿廢亂天紀四海生痼瘡
太原真龍飛凋瘵迴春陽
飄飄孫徵君肥遯際隋唐
妙術起白骨還丹日月長
茲山實邁軸警蹕過其旁
六龍舊轍跡草木增輝光
迢迢太元洞靈怪閼奇方
五月懸火鈴涼風不可當
張君此讀書負笈仍裹糧
邀我五臺上酌以流霞觴
君才如古人巢居成文章
攜手醉翁石天風動衣裳
山鐘忽告夕歸騎下巖廊
迴首望煙谷松蘿更蒼蒼

哀陳堂邑

枚及其弟元櫟

悽惻陳堂邑吾曾一見之
城空作亂後身死去官時
河岳留青骨旌竿笑赤眉
脊令隨杜宇隤血上連枝

黃鶴樓

江城風月總如斯，尚有仙樓占古碑。
黃鶴倦看人醉酒，青蓮應笑我題詩。
十洲花謝雲空返，三戶煙消水不知。
惆悵秦關何處是，憑欄多在日斜時。

三閭祠

三閭祠近楚王城，芳草年年繞砌生。
雷雨若通山鬼路，丹青宜榜水仙名。
西鄰狼虎原無信，南浦蛟龍豈有情。
莫以獨醒看衆醉，一尊椒酒爲君傾。

武昌雜詩將之沅州任作

客意含秋色，臨行慘不舒。
雖看衡嶽雁，猶食武昌魚。
澹月窺囊裏，寒雲送簡書。
江邊古黃鶴，縹緲更愁予。

挂席雄風在，吾將涉洞庭。
乾坤萬頃碧，今古數峯青。
月落

魚龍寂山空草木靈
遭迴南去路屈賈舊曾經

嵐翠環城郭高齋待我登
溪蠻皆士女山鬼亦賓朋
驅經唐韓愈刑蛟蜀李冰
爲官不廟食後世有何稱

杜鵑

怨鳥憶三巴
嘯痕溼露花
休言歸去好
歸去亦無家

解組

罷郡衣堪典誰言酒易賒
繩牀留待月鐵筆擬評花
朱鳳仙人宅青牛柱史車
淒涼千里夢無夜不還家

官似遠游客才輸新嫁娘
十年塵碌碌一笑海茫茫
悽惋成詩妙牢騷對酒狂
甯知葵藿性冷暝向春陽

送楊荔裳中書揆從軍

峨峨雪嶺與天齊
縮蜎毛膠萬馬蹏
多少詩家談覽勝幾

人曾到大荒西

蓬婆城外月彎彎
陟屺行人望早還
原上春令沙上雁
作

書先報賀蘭山

謝震字甸男侯官人乾隆己丑舉人官順昌教諭有樓

桃軒集

詩話甸男與恭甫太史同舉於鄉論學尤相得恭甫題其詩後有石渠高議經師盛惟遲匡來與說詩之句卒年甫四十著作皆未就僅有禮案二卷四書小箋一卷詩亦典麗雄渾置之左海集中幾不能辨

登凌霄臺

中夜清興發探幽散塵悃
本與青山鄰況茲良朋繼
褰裳躡危梯側身陟層巘
苔滑露下深天高雲去遠
俯首眺南溟浪闊魚龍偃
萬古長鴻濛憑誰問混沌
松風颯然至衆竅相往返
平野驅波濤羣山奔蜿蜒
震眩不可留爽籟吹

下坂攜手歌歸來柴門月色晚

核桃店早行

秋風客子忙何太孤館殘鐙悄無賴疲驢齧草吻有聲飢
鼠拱鐙眼全眯京華年少多冠蓋中原匏落空塵壒寒霜
照影束衣帶殘星墜水踏清瀨月黑深林鬼語悲泥蟠石
磴虎跡大時驚短褐樹榦挂偏留餘寐馬頭磕運舛惟愁
塵世隘途窮早視死生泰茅柴村店試饒春初陽一綫寒
山外

酬汪儀曹

炎曦正爾憂蘊隆祝融忽遜元冥功太行劍脊溢天外銀
山倒壓龜鼉宮陽侯奪國竄東海螭象無主奔狂蹤新鬼
舊鬼聚市哭南村北村孤桑空先聲鼓氣吼屏翳烈焰助

勢燒豐隆我時隱几愁臥輒惟恐倚杵傾蒼穹銳齋先生
有道者長安索米嗟幾窮竈突不墨墨衫袖庖輝無肉肉
魚蟲奔走蟬蠹伺虎豕被服孔鄭餐歐庸況此天公惡作
劇屋漏灌頂泥搏胸妻孥號號交徧謫心知理屈應以聾
自詡此祕世莫曉遠示好友郵之通我較先生更長策趨
避早越蓬萊東日長豈得免詢晉馬耳自不謀東風先生
官職稷嗣君先生經術骭子弓賢豪尙苦旦夕供何況擔
簦負笈從經蒙作詩藉答聊一哄平原霞尾倒景獵獵搖
深紅

漁梁懷古

四山合脊青巘屹清溪一綫流潺湲戰場中開五千步斬
王曾此梟凶頑嗚呼靖康之恥胡可舍大寶竊據儕元姦

禁苑錮閉理亦得尙恨南內非天山誰遣女將軍而達孟
家蟬臨安城夜縋瓜步江朝沿一日三百三日千江淮義
旅狹旬集鐵券迫賜徒爾然苗劉授首憤已雪子雱議廢
甯非慎古云孝薄厚於慈今看慈薄孝可知黃龍痛飲已
觸忌建儲之請胡爲乎格天閣中片紙出夜半直墮長城
師清涼居士早知此驢背青山看湖水背嵬軍散事無成
老卒看花歎晨起

仙霞關用周櫟園先生韻

窄徑盤紆入亂峯翠微深鎖碧芙蓉松關東隘風爭捲溪
漲摧輪水廢春紅葉煎茶供客話綠筠書字記游蹤年來
倦甚東西路惟有看山眼未慵

關門憑眺躡危途懷古深嗟大厦扶一旅親提空憶李三

藩潛構實通吳清江捲甲軍飛迅步障徵歌事有無欲問
興亡舊時迹夕陽惟對戍樓孤

參差旗勢萬峯長擬似孤雲兩角張山骨鋌幽窺石炭瓜
皮駛溜落松香樹間人語傳空際煙外鐘聲出上方到此
俗懷都滌盡塵纓那用濯滄浪

南山雨氣北山通薄靄孤村霽色曠甕甕靄窺天煙補隙笕
泉薦澗木剝中雲根漏日前峯幻磴脊緣霄左擔工贖有
琴書餘一束年年泥爪認飛鴻

得恭甫杭州書

接來三月上旬書讀罷新詩感有餘鹽鐵漫聽桓氏論治
安羣笑賈生疏參軍蠻府嘲鸛鵒措大荊州賤鰕魚壯志
銷沈只如此相看白髮已盈梳

蹉跎

趙北燕南轍幾過駒光馬迹老蹉跎
羈愁中酒綿三月草色隨春入九河
階下簸錢工姹女堂前挾瑟豔秦娥
風情已作蕭郎減目極寒空自浩歌

周光裕字衣谷號春帆天津人乾隆庚寅舉人歷官山西布政使署巡撫內召鴻臚寺卿有萊猗山房詩草
喜金曉巖明府自宜川來晤

總角交難得彈冠先後時舊痕衣上酒新影鬢邊絲宦人心逾怯情深遇恨遲妖氛猶未掃努力在今茲

鰲圖字伯麟號滄來漢軍旗人乾隆庚寅舉人歷官江蘇按察使有習靜軒集

來鶴堂靜坐

龔黃李杜千秋在三十年來結念深詩欲調高先養氣官
求民信早捫心夢魂憂此黃河水憔悴勞於白首吟文教
未行河未復慚疏吏治愧儒林

網師園看牡丹卽席有作

網師園中何所有半畝牡丹大如斗美人睡起繡被堆妃
子歌殘小垂手日照赤城霞散綺雙成在前飛瓊後須臾
鐙上錦屏開萬點明星落窗牖腰支瘦損倩風扶薄醉盈
盈一回首主人好客列華筵琥珀光凝杯上口金裙玉珮
洛中花雲合星聚人間友晉卿雅集圖長留太白春游文
不朽名花名園以人存風流我輩終不負

蔡村

一夜秋風起輕羅已覺涼微雲孤曉月疏影瘦垂楊近水

魚蝦賤沿隄車馬忙京東人語熟入耳更思鄉

偶吟

視事竭其思撫民盡乃心心所思到處澤已被之深網羅
開一面獵不窮山林萬物留有餘生機見古今

紀曾藻字文溪號小癡文安人乾隆庚寅舉人官思恩
同知有小癡遺藁

在荔浦憶永福縣宅

傳舍怱怱又促裝苦思水竹卽滄浪霜痕染樹紅躑躅山
影浸江青鳳皇鎖印恰當開甕後放衙時到小橋旁牙章
虎節南關路記取先生舊草堂

與王老圃夜話

春寒側側怕登樓凍雨殘雲似暮秋良藥誰爲養生主小

詩還可伴牢愁風喘卜築思嚴武火色功名讓馬周與子
對牀論劍術也能飛鞚試吳鉤

邵颿字無恙號夢餘浙江山陰人乾隆庚寅舉人厯官

金匱知縣有夢餘詩鈔

詩話夢餘工詩頗自珍祕袁簡齋居金陵夢餘以詩
質之所論不合乃不復與談亦不再示人故致力甚
深而知之者鮮

宮怨

花發長門又一春守宮檢點臂紗新捲簾通得昭陽月閒
話琵琶出塞人

筌篲引

洪濤射日河流渾一叟披髮狂而奔鼉鼉攫食翻層濤呼
公無渡公不聞中流無人水忽立河邊婦人對河泣恨妾

不渡公之前公見妾死公當旋

田均晉字康侯玉屏人乾隆庚寅舉人官中衛知縣有
魚樂軒集

循黑山而東望賀蘭諸山

矗矗賀蘭山黑山之尾山石殊礪礪山形何倣詭聯絡
受降城襟帶黃河水月竈大蒙人乳酪此趨止聞昔勝國
時河套逞姦宄非無濟時才長城實自毀於今百年間職
貢盛筐篚所怪巖壑陰積雪夏常皚朔風捲地來塵沙障
天起豈惟昧朝昏兩目苦先眯人生行路難沾襟方陟岵
游白塔山寺

紺宇煙霄上芒屨翠靄間一聲雲裏磬萬疊檻前山遠樹
懸殘日長河繞故關因之悲往事斷碣剔苔斑

勝金關

地自古西夏關門驛路通人家荒磧外樹色亂流中斷嶺
皆趨北歸雲祇向東郵亭聊小立輕颺酒旗風

金城關

驚濤急浪打城頭獨上河關百尺樓遶樹不遮千里目青
崖白嶺古涼州

張雲璈字仲雅錢塘人乾隆庚寅舉人官湘潭知縣有

簡松草堂集

趙雲松曰仲雅學博而才雄思精而筆
銳馬秋藥曰修潔玉立詩稱其爲人
詩話仲雅先世本海甯陳氏爲後於張家承閱閱又
爲嵇文恭之壻梁文莊之甥濡染有素居官慈惠時
稱張佛子生平慕袁簡齋趙雲松故取搜神記語以
簡松名其堂然所作斂才就範出以修潔是能取趙
袁之長而不襲其流弊者

河間

兩度城邊過驅車斥堠長九河無故道六藝有賢王老木
風生虎平沙石卧羊當年暴公子繡斧鎮巖疆

景州

滿目悲行役憑誰問苦辛寒聲催白雁鄉淚積黃塵淀外
冰猶壯營邊柳不春由來燕趙地慷慨說佳人

戊戌正月十二日與兄話別邗關

津亭攀柳一分黃去住無端各自傷顏色定知殊惘惘前
程如此太茫茫久憐京國多塵夢似望并州作故鄉白髮
衰親好持護客中最憶是高堂

相府蒲桃歌

相府蒲桃根似瓊傳自相公親手種相公種此纔弱齡七

十餘年歲華共蛟龍拏攫庭之隅風雨終年任捲舒千條
慣舞流蘇影萬顆疑垂照乘珠中台星坼方逾載丹旄南
歸遠言邁公子都依堊室居官僚空指沙隄在苑中早墮
綠沈瓜隴上俄來元甲隊綠野堂虛少客行平泉花冷無
人對螢照徒從幽徑明燕飛時有重簾礙窗前鸚鵡綠無
聲座上珊瑚紅尙碎質春廡任別人來朝天漏向何時待
庾信居然宋宅游杜陵早動房池慨遽令小草失春暉不
使清芬有遺愛葉葉還同路柳芟枝枝翻作甘棠敗我曾
讀書此樹下小院房櫳最清暇每見春時起蟄根嫩綠離
離堆滿架月中清影過牆來雨後輕梢向空亞合教馬乳
酸新醅一斛涼州夜光瀉豈知轉眼不堪看無復餘陰覆
臺榭相公平生有清德物玩從來不少借定知此樹戀公

恩同公榮壽還同謝我思手澤空怵怵未免今昔縈心情
不及當年崇讓宅牡丹猶伴玉溪生

顧晴沙先生詩冢歌

君不見萬山下沈石一片當時誰識征南面千年而後或
在山陵谷從來有遷變又不見唐求山人一个瓢貯以詩
藁江中拋爲祝斯文不沈沒得者自識吾心勞從古名心
不肯死姓氏長教堆故紙骨雖已朽力可爭所志區區只
在此晴沙觀察旭光操選政隱然以詩爲性命對此如逢桑
梓恭采來似奉輪軒令選詩既畢還梓詩梓之不盡終有
遺錄取精華置糟粕其詩自在當聽之欲將賸藁投水火
素齋居士崧言不可請從劉蛻文冢例藏以元宮位置妥

一杯黃土函精英深山夜黑風雨驚青燐熠熠來相迎冷

光閃爍如有聲如有聲不能語多年故鬼小於黍丿于寒
空淚如雨吁嗟乎文字潛幽氣不滅漿酒寒澆心尙熱請
看一字二字閒猶是千痕萬痕血我聞嘉會惜未逢今請
一言陳賈公昔人有詩集曾藏佛寺中何不將此置之龍
光塔呵護仗彼諸天功旃檀香辟蟬蠹走波羅巾拂煤哀
封安知五十八卷無人續來補先生所不足不教滄海有
遺珠更遣藍田還種玉沙中再揀幾番金椽外時逢一枝
竹但令死作燄如虹莫便生將劍埋獄我願告君速開壙
定有精光一齊放得書不比汲郡人發邱且學中郎將

浮山禹廟觀山海經塑像

江都縣治西有石同培塿得毋類地肺或可比石紐巍巍
白馬兒廟貌建已久鼎旣鑄神姦上復範妍醜門前諸塑

像奇怪得未有土功徵狸力水祥見長右畢方火爲訛聞
磷風是吼鍾山燭龍潛平圃英招守鵲旣怪多足羆又笑
無口山膏雅善詈釘靈徒解走三年出象骨十日炙女丑
神鼓雷澤腹帝斷刑天首一搏居有窮九山食相柳蚩尤
弃桎梏貳負遭鑕鈕凡此諸異物其理難細扣歧舌何能
語反膝安可蹂船或坐而削絲或據而歐魚或海上捕蛇
或耳中受不知歲常然抑或事有偶無脣旣已死何以心
不朽夏耕旣無頭何以走厥咎女尸化菰草譬若柳生肘
淑土處栗廣不異身橫畝陰廊風雨青虛室神鬼黝森然
來搏人駭駭張血拇令我不敢前頗覺驚心陡昔讀山海
經疑蓄不能剖是書所由來云出伯益手自宜比禹貢同
爲百篇取崇伯有世系乃爲駱明後羽淵化黃熊殢渚復

是否考之於諸書不合十八九上甲微王亥況又殷事狙其說皆荒唐直可覆醬瓿每思起九原質之文命后龍威遁甲書從此多紛糾祖龍見神人漢武宴王母皆於此濫觴奇說相煽誘安得崑崙墟開陽作干揶不信乘吉量遽有千秋壽歸來眩心目萬怪踰戶牖且操東向杯帝漿以爲酒

黃鶴樓

秋色西來萬里蒼憑高極目楚天長羣山直到荆門綠斜日平添漢水黃鸝鵲隔江憐處士蘭茝無地怨孱王我曾跨徧揚州鶴一例神仙事渺茫

張鶴原名鈴字嘯廡號陽扶卽墨人乾隆庚寅舉人福建候補知縣

詩話嘯麻少時嘗夢至海島島上茅屋三楹顏曰嘯
麻一道土坐室中示以瓦有二十字曰爐內雪味融
鏡中花香細云何能攝心禽之
制在氣因以爲字並作詩紀之

晚次黃河厓聞角聲

西原日落戍旗黃暮色人煙兩渺茫誰倚秋風吹畫角黃
河厓上月如霜

特勝巖下作

奇峯有此碧嶙峋得到應無塵世人隨處寒苔皆鶴跡多
年禿樹總龍身雲中吠犬生虛籟天半吹笙集上眞擬陟
層巔通問訊空山或有葛天民

萬廷芮字漢吉號荻鄉南昌人乾隆庚寅舉人官安福
教諭有是陶軒詩藁

過太子庵

八大山人晚年流寓於此

湖光十里長芙蓉一片清風似雨餘綠竹可憐高士宅青山難得好僧居阮公歌哭來歧路張儉飄零到草廬風景何堪人去後灞橋容我再騎驢

初夏寄夏煦園

只合頑金鑄閬仙當歌猶得故人憐置書懷袖將三歲作嫁裁衣竟十年到岸山光看雨後過江人物想風前登臨是處成陳迹粥飯拋時再問緣

鄭洛英字耆仲號西邇侯官人乾隆庚寅舉人有恥虛齋詩鈔

江行

去去更誰適孤舟又短篷天長風易怒村晚樹尤濃雲凍不成雨燒明何處峯故園歸未得歲暮尙飄蓬

劉塏字爽亭又字倣人順天通州人乾隆庚寅副貢歷
官大理同知有宦游吟

思茅九日

九龍江靜虎聲哀白馬山空象蹟迴滾滾怒風驅瘴去瀟
瀟愁雨送秋來一年形狀羞吹帽萬里關河懶上臺拌取
殊方桑落酒強浮今日菊花杯

澧州旅店

雁到瀟湘總北還更誰南去過荆蠻親朋有夢來相問野
店蕭騷夜未關

和瑛原名和甯字潤平號太庵蒙古旗人乾隆辛卯進
士官至刑部尙書諡簡勤有易簡齋詩鈔

詩話簡勤公爲吾師席卿家宰曾祖乾隆季年以內
閣學士出爲駐藏大臣嘗撰西藏賦山川風土源流

沿革探撫纂詳詩鈔道光初刻行吳蘭雪爲序余從
厥市得豪本五册有燕庭藏書小印蓋劉氏嘉樹移
故物也

嘉平月護送參贊海公統軍赴藏

萬里烏斯藏千層拉薩招班禪參妙喜達賴脫塵囂叩額
諸番控雕題百貊朝家家唐古特別蚌屬庭臬

化雨真無外三汗舊獻琛

巴爾布舊有三部酋長一日布延汗一日葉楞汗一日庫庫木

汗康熙間納貢爲三汗與藏地通貿易

穴爭同鼠雀蠻觸起商參未許干鍰

贖何難一戰擒

五十二年巴爾布乞降遣要人納貢

聖朝同覆幬黑子已輸

忱

青海諸番道兼衣夏月過冰天無汗馬雪嶠有埋駝地險

達般嶺天通穆魯河噶達蘇屹老

過此卽西藏界

超躒快如何

百騎巴圖魯千員默爾庚琯弧隨月滿長劍倚霜鳴失策

憑垂仲喇嘛能卜者名垂仲拋戈恥戴紉番自領兵者名戴紉由來古佛國持護仗天兵

東俄洛至卧龍石

朝發東俄洛山坳布羣髻迢迢大雪山萬頂覆銀甌皎然無黑子寒光射酸眸絕頂矗鄂博哈達紛垂旒乃有高僧蹋雪迎道周敦多伽木嗟紅帽薩迦流檐帷獻酥茶聊以金帛酬西南循鳥道玉沙畫而修前驅烏帽沒乃知下危溝蒼松密排拶萬幢懸碧油峭壁五色燦連岡四面幽宿宿卧龍石夜半魂夷猶

中渡至西俄洛

朝渡雅隆江浮梁乃舟造山谷爲我廬又入西南奧深林蔽天日人迹眞罕到凜冽刺毛骨蜩縮馬牛蹕小憩麻蓋

中有如出冰窖誰知鏡海上雪比琉璃曜日華炫素彩護
眼青絲罩卅里波浪工白霓愁遠嶠所欣陰曠合絕頂快
覽眺四圍山卧平萬疊雲垂倒僕從忙戒嚴此間多劫盜
潛居黑帳房長年無井竈弓箭各在腰刀劍時懸鞘斯言
咄可怪我乃粲一笑飢戶守荒山荒山多虎豹呼取來壩
來爲我作嚮導

宿頭塘

阿喇伯桑西喜宿頭塘早罡風搖板廬孤枕雪壓腦挑鐙
不成寐默坐紆懷抱硯凍墨不濡指直筆敲倒今夜莫吟
詩吟詩定郊島呼童膺復眠起視漫天縞郵番促晨裝長
繚羗牛套且去問前途冰鏡滑如掃

木鹿寺經園

華夏龍蛇外天西備六書

唐古特字甲噶爾字廓爾額字厄訥特克字帕爾西字合之蒙

古字重譯六書

羌戎刊木鹿儒墨辨蟲魚寺建青鴛古經馱白馬

初何如蒼頡字傳到梵王居

班禪額爾德尼燕畢款留精舍茶話

法筵肅肅開雁堂旬坐目食盤成行葡萄庵羅兼糖霜饌
饌陳黯饒頭僵藤根剝剝割乾羊鳩盤茶杵牛酥漿龍腦
鉢盛雲子糧麥炒豆醋盃金量金薦榻並獅子牀有如巖
景對若光須臾樂奏鼓謙鏗火不思配簫管揚振童十人
錦綵裳手持月斧走跳踉蹌踴應節和鏘鏘和南捧佛幣
未將哈達江噶加縹緗花毬霞氍毹兜羅黃檗蒲伊蘭螺甲
香主人顧客樂未央願聞四果阿羅方客曰養心妨虎狂
孔戒操存舍則亡出入無時慎其鄉佛傳心燈明煌煌瓶

穿羅縠雀飛揚儒墨相整理相當定靜止觀歸康莊卽心
是佛真覺王主人笑指河汪洋我鑽故紙君吸江

題路旁于闐大玉

喀喇沙爾東一百八十里烏沙克搭拉軍台路旁有大玉三大者重

萬觔青色次者八千觔蔥白色小者三千觔白色置於地台弁云此玉運自葉爾羌西將以入貢嘉慶四年二月奉旨截留毋庸呈進今四輪車亦毀於此

詔棄于闐玉埋輪蔓草蕪來從西旅道採自屬賓隅駕鼓
勞天馬投淵卻海珠何如此頑石罷役萬民蘇

不刻摩崖字光明帝德昭瑞同麟在野喜見鵲來巢崑璞
依然古羌戎逖矣朝鬼神牢守護莫任斧斤招

題巴里坤南山唐碑

庫舍圖嶺天關壯沙陀瀚海南北障七十二盤轉翠螺馬
首車輪頂踵望高昌昔并兩車師五世百年名號妄雉伏

於蒿鼠噉穴驕而無禮不知量寒風如刀熱如燒易而無
備胥淪喪賢哉柱國侯將軍王師堂堂革而當吁嗟韓碑
已仆段碑殘猶有姜碑勒青嶂豈知日月霜雪今一家俯
仰騫岑共惆悵

過昂吉圖淖爾鹽池

風沙初煮海粒民五味厭青齊伯圖繼江淮鹺政添奇哉
祁連頂天池珠漾簾停車問野老野老語安恬此中饒白
鹵往來勞一杓輪臺不淡食萬斛充閭閻官無權稅擾民
無私販嫌售錢斗三十八口溫飽兼予聞野老語斂容感
至誠玉華漚北詔水晶廟南巖山南百里名鹽山口產鹽如水晶堅於石不費
煬竈烈更省火井炎地道不愛寶頓教水石鹹天道施美
利絕塞民夷霑敲詩笑東坡三月食無鹽

馬慧裕字朗山漢軍旗人乾隆辛卯進士改庶吉士授主事官至禮部尙書諡清恪有河干詩鈔

喜復得雪

前日風迴雪沾濡恐未齊一番重灑落幾寸徧高低井邑豐年穀山川息鼓輦何當呵凍筆歡喜更標題

邵晉涵字與桐又字二雲號南江餘姚人乾隆辛卯進

士改庶吉士授編修歷官侍講學士有南江詩藁

詩話二雲經術湛深著爾雅正義發明故訓在四庫館搜輯薛氏五代史各條皆標明所自出近始以原藁刻布詩多古意蘊蓄既深發聲自遠

秋夜作

英英西山雲霏霏被高樹明月無餘暉飛來落何處江草日蕭疏江花淡容與想見羽衣人乘月披雲去卽目媚芳

華孤懷感羈旅雲中君不來風鈴夜深語

五岳挂胸前不掩青銅鏡起看天宇光星河長耿耿俠客
騁雕鞍幽人理瑤軫冉冉菰蘆中秋水相與永誰將一縷
絲持作千年競屋角曙烏曉砌下吟蛩靜

五月芰荷花七月芰荷葉花葉不相依雲水不相接故人
萬里餘迢迢鴻雁蹟不感故人懷怨此清秋節

萬柳堂

橫雲池館已荒涼衰柳今依選佛場細路獨來尋曲澗孤
亭無主倚斜陽蘆搖霜氣飛千點雁逼風稜併一行惟有
西山肯留客溼嵐如畫石橋旁

似聞春露濯靈姿上客先拈白鳳詞花氣撲筵香是霧歌
聲吹夢雨如絲我生已晚悲前度樹豈能言感昔時日暮

陂塘迴瘦馬碧雲黃葉去何之

觀二樹山人畫梅卽和題畫詩韻

青袍筇竹淨無埃萬點疏花腕底開想見銅坑風雪路倒騎驢背獨吟來

誰見靈蚪布格奇遙從雪海望迷離能吟空際疏花點只有朱三十五詩

錢澧字東注號南園昆明人乾隆辛卯進士改庶吉士

授檢討歷官通政司副使復授御史有南園遺集

詩話南園以氣節著其詩書畫皆卓然成家然惜抱謂和珅自張威福能訟言其失於章奏者錢侍御一人而已又稱其詩蒼鬱勁厚得古意法梧門稱其精深博大非講聲律者所能窺洪北江謂爲當代第一人卽以詩論亦不作第二人想又云錢通副詩如淺語桑麻亦關治術無意學古人自然入古皆篤論也

宿太華寺

半壁蒼煙擁薜蘿江禽唳處晚船過樹交危磴盤青靄天
縱飛樓納白波夜不分明花氣冷春將狼藉雨聲多愁中
不眠耽幽興佳水佳山奈爾何

江南送客

楊柳西風起暮濤獨將鞍馬去江皋燕臺客到黃花滿楚
澤書迴白雁高善藥舊憐汧汭統繁聲新度鬱輪袍鴛鴦
湖水多明月知有愁心憶大刀

送輔臣宗兄赴平魯兼寄望峯

馬鳴夜火戒征車北出居庸去路餘雲勢九邊臨塞慘雪
痕三月冒沙虛民耕斷磧時登粟官坐空衙或藝蔬隔面
十年家萬里莫驚相視鬢斑如

八月十七同徐鏡秋望月

脫木西風日夜飛中庭月白見星稀瓊樓高更知霜早已
進幽風問授衣

送師荔扉之永平府

霜飆連夜飛客子待曉發僕夫起秣馬烏叫女牆月蕩蕩
盧龍闕茫茫右北平古來雄偉人幾輩騰英聲書生何足
爲往來甘飢疲飢疲不自惜足以昌吾詩來見菊始黃去
食蟹垂盡日月暗移人奄忽若旋軫予鬢無多髮變素已
三年子眸炯若星先日明曙天家近海西南游窮海東北
海水自通波日夕盪胸臆有時忽清發出聲來天風鯤鵬
兩幺騰視之若斯螽所惜竹林子彭南池歸向故山卧不然
競出奇迭唱與子和子去余何嗟相期在桃花何緣寫此
詩寄向天之涯

龍門作寄望峯

龍門蔽洛崢兩山清伊北走經其間一年佳賞惟有雪盡
補缺壞蘇枯頑嗟此天生奇妙地偏遭剝斲丁時艱禍首
胡靈繼周墾造寺日役千僮般窮極土木意不已山靈無
術免憂患我昨南歸值晴霽周視不禁凋朱顏賓陽洞古
尙因勢幽暗故是鬼所寰奪取爲佛雕巨像青螺簇腦千
髻鬢露胸袒右盡趺坐捧以么膺髯頭蠻門側力士倚壁
立鱗甲動肘修蛇攬肩差足比尙不一悉抹金碧填朱殷
最後黝黑視不審高處似是垂花鬢嗟此地乃作俑始餘
遂踵事日無閒有如道左一家宅巨壁鑿空成通閭側倚
傍附亦不論舉椎持鑿繩或攀一龕工就費幾許逕見連
車傾府園就中豈但司農積恐兼司寇之罰鍰氓隸何識

亦奔走金銀菽帛輸無慳紛紛似中風狂疾甚有婦女捐
釵鐲高簇蜂房下狗竇徧列對岸窮前灣自知奉佛以祈
福豪毛肯恤惇與鰥密文酷網連連起無辜十九填狴犴
當時豈無有識者目擊徒有悲淚潛竊議語未及脫口已
見流血戮謗訕豈料留遺到今日狼藉只便蝨陰姦諸龕
頗有

丐者或云盜
賊夜亦棲止

像設摧折莓苔雜腥腐熏灼煙煤黷媧皇補

天尙有石誰乞補此初質還又無壯士手巨刃盡情爲我
纖悉刪懿哉滕六善所職玉花翦刻一律頒回旋少覆乘
巽二抵隙投閒力尤嫻遂使山靈霍然起亭亭瑤立忘夙
寢我沿濯龍池再往寒磴滑澁披凍菅鴻雁低下時留爪
高坐惜尾餘白鵬疑冰荒狐隱不渡深罅腹有撲朔踰瑤
林玉樹各挺挺未惜埋死幽叢蘭昔者思公守洛日坦懷

待士無防閑留此縱賞屬歐謝酒車載妓來班班我行無
侶唱無和一形一影何孤孱有兄遙阻太行北極望不見
天井關荒店凍杯只獨酌燒殘燭淚花煽爛撥灰炙硯送
長夜敲傾紙上千痕斑重緘欲寄待明發倒身被底如弓
彎清伊對戶亦識我寒聲丙夜逾淙潺

南陽道中家力堂呼一露車並載疾行因作此詩

有棧之車晨載途日欲出地煙模糊觸輪望蹏冰頑犢一
駟一駭羸且驚登之恂恂百憂俱御乃欲速鞭而驅驅之
遇坎乃下扶吾兄意色略不殊笑謂此豈遂足虞自從陟
地門懸弧天地中身盤中珠九龍江瘴如炊鑪地厭行人
肝腦塗生還得騎生馬駒逾江河暨燕之都喀爾喀烏里
雅蘇無冬無夏衣羊狐沒腰積雪凍禾枯窺覘數數來鳶

烏此行還鄉實不圖更知他日胡底平儻從汝意東游吳
風狂浪大舟楫孤舟中人血蛟龍須據鞍之髻久無膚移
置車上亦何輪知處身如楸株拘相與並載何驚吁我聞
兄言將兄鬚大塊勞生有是夫有如我者信非夫挽車平
地猶趲趲

蔣溝用壁間詩韻

漳水冬猶濁黎城晚更孤凍煙迷短景積雪漫荒途衣薄
煩人問筋羸仗酒扶向來宵寐少不恨樹號烏

還家

代馬不忘北越禽欣南樓游子乍還鄉怱怱意翻迷入門
見父母惜我顏黑黧長跪進致辭行李實慘悽爲言不足
憂吾腸便藿藜諸弟出營食顧見蓬頭妻弟婦拜且卻小

妹嬌還颺阿長裴氏子父母死備余家將米歸黑鹽手並齋喜傳豆
角熟不但食黃齋堂堂七尺軀壯齒生久齊飢寒上累親
不如跪乳抵

春雲亂漠漠春草碧萋萋我始至前村竹根鳴午雞是維
二月初萬生咸已齊人情同念舊別人見未迷走視太史
公簪筆入金閨豈聞去年水飄蕩家無棲辛苦留性命還
歸理故蹊雖無完廬室幸庇舊鋤犁聞此痛五中熱淚千
行颺骨肉幾不全功名何足稽死當狐首邱生當龜曳泥
黃昏忽細雨孤鐙照淒迷叩門欣弟歸赤腳踏水泥始知
仲已遠或到武昌西叔壯頗復銳季長與我齊狂喜出賒
酒夜久滿瓶攜噉我問生事杯進不容稽人生固有窮但
恐制行低齊人饗富貴羞死妾與妻

過李氏飲

小築成何歲清尊共此時白鷗迴露渚黃蜨颺風枝盤胷
文章酷全生畎畝宜幾知麟閣畫空負鹿門期

野寺

野寺秋花滿閒僧不出門修篁通別徑流水自前村淪茗
新瓷潔焚香丈室溫未堪留白首聊得坐黃昏

長風

長風動湖水黃鵠起飄飄立秋已昨日歲序逝莫要我
有百廿指難終賴漁樵計更出門去病久筋骸凋默卧念京
師長路漫迢遙尙欣人不忌所志非金貂

細月光隱隱照我做牀席瘦妻中夜歎十載久爲客未育
一男女聊與慰晨夕更知幾何歲復得同安宅昔日兩鬢

髮今一己見白從此盟區中何堪照顏色

明日具晨飯益已無粒米堂上儻復知分責逮諸弟弟壯
各能力茹茶甘如薺時命有利鈍此意人所體遠行堪代
耕私情復何啟獨有涓涓淚沾胸濡若洗

得萬荔村王宜泉書

聯舫已傳逾大別之官幾日到隨州故鄉水投碧雞市客
子風吟黃鶴樓豈有奇方能縮地空憑素札一將愁鐙昏
墨淡霧遮眼木落堂空霜在頭

林樹蕃字于宣號香海侯官人乾隆辛卯進士改庶吉

士授編修有南陔集

詩話香海爲鄭荔鄉外孫少孤母授之讀九歲能誦
十七舉於鄉二十三成進士入翰林出典浙試還京
遷卒年甫二十八朝士咸深惜之孔獨約爲作哀辭
又銘其墓深致悲惻集亦揭約所定古體詩五言擬

景純嗣宗七言學太白皆能具體近體詩骨幹清逸
詞旨英邁其所取法在文房牧之之間使天假以年
造詣何可限量即所成就同
時閭中稱詩者無與抗手

感懷

阮公識最密至慎似埋照登高懷永歎曠觀託長嘯陶令
解形神飲酒復歌妙北窗傲羲皇南山展游眺共抱千古
心還韜至人曜余懷愧虛白彼美孰同調庭樹含幽姿奇
芬豔初發秋風吹嫋嫋生意還銷歇絕代有蛾眉皎潔似
團月高義悵不諧良辰恐沈沒偃蹇華年衰此情竟誰達
灌夫壯烈士少小負奇志揮劍敵胡兵咄嗟復讐計使酒
非所病罵座獨豪氣生平薄田蚡豈識有權貴不學鄙夫
等反覆趨勢利

西京重功名節操久不舒衛霍事權富孔匡亦迂儒惟有

蓋次公忠國真丈夫慷慨託酒狂許伯誰能拘眾賓旣歡
聚仰屋長歎歔閱人朱門內歎息傳舍居

秋夕旅懷

秋聲渡江來秋風滿江水吹我浩蕩心一夕走千里千里
共清秋片心和月流今宵水上月照到鄉園幽鄉園在何
處引入愁中路落葉下紛紛浮雲拂高樹仰視浮雲歸滿
空星斗稀不知烏鵲意日夕向南飛

游平山堂

揚州二月天始晴蜀岡連縣春色生山梅向暝紅欲破千
折百折隨人行花源隔村辨花塢翠閣朱闌不知路冶春
裙屐多少年醉拂銀鞍柳邊去

竹西明月最佳處中有仙人吟舊句斷劫流風五百年一

種消沈散煙霧醉翁逝後坡翁來當時感慨何悠哉龍蛇
粉壁今安在如此佳游能幾迴

登望湖亭

九江如髮歸潯陽彭蠡勢欲排南昌太清元氣日相撼東
南忽圻天蒼茫天垂地盡濤聲去有客登高獨延顧日出
唯看蹴浪浮雲飛不到開帆處昨夜秋風來楚關數聲哀
雁浮雲間望湖亭上一流目片片飛入康郎山眼中浩蕩
迷舊國一葉飄然作孤客波神彷彿解我懷三日送我吳
城來匡君五老亦相笑問君遠游何日回吁嗟乎禰衡躑
躑鸚鵡洲王粲獨上荊州樓書生命蹇不如意風塵滿目
多煩憂徑要江湖萬斛水洗我胸中結轡之奇愁我今欲
上滕王閣秋水長天日寥廓廣宴時無閻伯璵子安詞賦

空蕭索又欲往觀豐城古劍池拔劍卻立星離離張華雷
煥一死不復得縱有干霄紫氣誰當知以茲落莫還揮手
不用登臨更回首他日重乘萬里風騎鯨直上攀南斗

登報恩寺塔

杖策尋初地來攀第一層帆檣三楚色煙寺六朝僧塔湧
江光動臺連雨氣蒸紛紛閱年代唯有佛前燈

秋懷寄長實

搖落江南秋復深無端望遠思沈沈河橋夢入千家雨澤
國寒生一夜砧公子蘅蘭傷楚佩美人刀翦送秋心芳洲
日夕孤鴻起欲採瑤華怨不禁

江干偶詠

不覺新愁減帶圍客舫猶繫水邊磯寒生昨夜初飄葉秋

在他鄉聽擣衣江介有風常北轉夢中無路卻南歸關情
曉向亭皋望蘆荻蕭蕭雁更飛

溪行雜詠

露冷煙深江樹稀孤舟夜泊鵬聲微平沙江上寒蘆渚一
夕西風白雁飛

湖船雜吟

迢迢帆影水雲間估客乘流意自閑行到南康須刮目潯
陽門外見廬山

吳俊升字宅三號芷泉沅江人乾隆辛卯進士改庶吉
士授編修

通慧寺

蒼涼平野望招提岸蓼汀鳬水四圍石徑行來紅葉滿鐘

聲斷處白雲飛廚寒芋火僧慵慣戶冒蛛絲客到稀牘有
一灣明月在殷勤相逐送余歸

程晉芳初名廷鎮字魚門號菽園歙縣人乾隆壬午召
試授內閣中書辛卯進士改吏部主事授編修有勉
行堂集

詩話魚門以校勘四庫全書由部曹改官翰林與王
漁仲後先媲美詞林掌故不多觀也生平好推轂人
士京師語曰自竹君先生死士無談處魚門先生死
士無走處竹君者魚門房師朱竹君也歿於關中畢
秋帆爲經紀其喪人皆感秋帆之篤於
友誼卽魚門之夙行信於朋友可知矣

馬陵道懷古

馬陵月黑山無路火照白書看大樹伏騎爭馳萬弩開昔
日龐涓死此處監子成名一代雄滅竈七萬垂奇功誰言
捭闔效鬼谷十三篇本傳家風當年共學交何篤牘也雖

賢涓也毒遠召旋將黥刑施智不如葵難衛足忽逢齊使
竊載歸上中下駟參兵機輜車坐計勝已決強齊乃藉刑
餘威君不見張陳刎頸原相倚解印封王還切齒假頭已
見購常山怒魄空憐墮泚水石契蘭交起戰爭古來恩怨
繫功名輸他鷗鷺忘機甚汀月溪風共主盟

獨游清涼寺

祇洹出人境暇日聊探尋殘雪覆簷瓦不知春氣深稍稍
水鳴磴淅淅風生林澹然冥羣想對此松柏陰蘿月自延
賞山禽多夕吟孤亭峙空際更指遙峯岑

有懷韓伯慧

清淮握手暫逡巡鬢髮驚看漸染銀文物雕鏤虧福命江
山蕭瑟老才人孤琴泛雪誰傾耳雄劍如虹自繞身歸去

蘇閭門巷冷綠槐深映舊家春

光堯玉盃歌

疇昔曾讀浯溪詩建炎酒解詠汝羹浮青滴翠但想像何
來玉盃光陸離文曰光堯法大篆遍體瑩潔如凝脂當唇
一寸獨純赤晴雪影裏紅霞披六陵夜發異寶出製造想
自淳熙時貍奴一蹴癰者帝雖非己出誠佳兒老作閑人
謝機務忘憂便面時自怡是時戎馬稀游牧不厭偏安保
南服魚脆初陳安嫂羹雪香更進梅花粥料應此盃列長
筵翠釜銀盤錯彩鮮不知侑食徵歌夕可憶冰山雪窖天
吁嗟壽皇真令主一飯何曾忘中土岳韓去後更無人怪
底金甌缺難補卽看孝養備情文尊號堂堂嬾放勸蘭棧
紅鴟芳掩冉龜兒雁翅舞繽紛君不見杯羹且望分強敵

擁篲迎門何踧踖又不見南內淒涼蜀道歸自調龍笛教
張徽豈如聚景園中風景異引觴遙挹蓬萊翠玩好先呈
德壽官山陵雜置溫明器沈歎重華積草痕瓊卮墮後缺
晨昏老臣淚浥雲衣溼天道悠悠未可論

次韻陳直方見贈卽送南歸

草草相逢袂遽分人中酒粹比崔羣一編綠字欣初覲三
歎朱絃久不聞春雨太繁憐作客梅花正好未留君江南
故舊知垂憶爲道沈吟對楚雲

臘日偕璞庵伯思白華習庵姬傳小巖集夢樓侍讀

寓分得連字

餘雪尙飛殘柳絮新泥欲浣錦鞍韉客晴天作魚鱗澹選
勝筵慚馬齒先酒盞春波剛在手蒞盤寒色又經年傳芭

故事深宵話排戶欣看月色連

景泰發藍唾壺歌

發藍製本拂菻國字隨音轉恆譌乖景泰仿造特精麗昨
偶把玩從西街圓儀仰俯利開闔黝光自瑩非摩揩洪爐
鼓鑄僅七載漸忘邊警耽淫哇有如金花牀上坐雞犀翠
羽當前排

拂菻國多雞犀孔翠其王坐金花牀見舊唐書

衛侯設定避餘穢魏皇

吐亦生芳茝竊黃小白加塗飾湧現蒼巖古苔色海南事

事尊法輪描畫紅蓮繞香國從知如意難敲破緣以胎銅

堅不愜雲雷四面隱文章珠玉九天承咳唾寡兄此際閉

南城捉髮初無叔武迎鍍梁繡袋讒方搆牙盒金錢賞未

行鎔鐵鍵門同範器石徐唾手圖功易示喜徒傳進粥甌

復辟錄英宗臨朝謂羣臣曰弟昨日食粥無恙

灌神不改揚瑤觥

英宗實錄天順元年禮部奏祀

天地社稷舊用瓷爵景泰間易以玉應否裁改詔仍之當時備匠厠卿貳此技知經

誰攷藝錢唐司馬善匡扶寒嗽何曾忠武異翠汁貧管授
祕方詎聞御物同頒賜吳言宰相工細唾讒語閤人示十
字多年陵塚上牛羊流沫無人誦碑記蘇勃泥青巧刮磨
區區鑑賞類宣和宮人豈少靈芸淚但灑秋池化碧波

招均弼筍河小飲

炙硯旋冰爐易燼連朝始是十分寒顛風繞屋作雷吼碎
月浸堦疑雪殘呵手仍煩長袖護褰帷時取故書看韭芽
細煮松醪熟可少同心話歲闌

移居

戊子二月移居琉璃
廠之火神廟西夾道

擇木孤禽豈易安每緣風勁慮巢寬眼明乍指琉璃界襟
淨旁瞻薜荔壇室小閨人傳語競巷偏客子出車難深宵

始覺南榮好處處支窗有月看

風前小酌別花卮已是丁香破粉時知爾依人情不淺慚
予入骨俗難醫過頭竹記攜甕灌空腹榆經倚檻窺辛苦
山僧行腳慣撫筇循玩去遲遲

廠東西畔結深廬藏海微身一葉如聽鼓趨衙塵擾擾打
鐘喫飯步徐徐勢家歇馬評珍玩冷客攤錢問故書儻趁
春銕倦游厯煮茶燒筍幸過余

放歌

老夫行年五十百無一能祇捉筆奏牘連行烏作焉官
書纂義十遺七譏姍譏訶雜然至時復關門引微疾季冬
行及仲冬畢風緊簷頭吹罽簾氈簾布幄下層層宛爾重
綿裏蟣蝨詩騷子史羅滿架嗜若兒曹慕梨栗審音高下

勘唐韻斷義精粗申漢律眼底清明翳障除胸中磊砢光
怪出自有蕭閒自弗耽日日從人甘縛桎不求空山餌芝
朮不理荒園種柑橘待築書樓四五間井深汲用長繩縹
朝光熒熒花散蕊夜深沈沈燭挑聖數甌白粥可扶身三
尺烏皮足容膝視死生如經旦暮貧賤知非難人術生平
茹蘗同食蜜誰信蓮枯猶有蕊蹊田正好爲飯牛啖菹行
且潛吞蛭掉首終慚出世遲白髮盈顛不堪櫛吳門煙水
一千頃何日歸舟月涓吉吾蛇尙在喜方溢吾舌猶存語
毋失窗前雪花灑蒙密起舞長歌用自逸敲枕懽騰上初
日

訪寒葭潭故居丁香作

前度人尋舊折枝出簷高格益爭奇攜家徑去眞成忍躡

屐重來勿訝遲新露柔風相掩拂疏香妙態自矜持款門
例不煩詢主幽榭聊須憩片時

龔大萬字體六號荻浦武陵人乾隆辛卯進士改庶吉
士授檢討官內閣典籍有賜扇樓草再游粵西草

衡山舟中曉望

長夜不成寐船窗小月明岸花醒酒氣人語落江聲作客
經年慣閒愁鎮日生又逢佳節近惆悵故園情

孔繼涵字誦孟號莊谷曲阜人乾隆辛卯進士官戶部
主事有紅欄書屋詩集

詩話莊谷少工詞章年十五以詠蘭詩爲時所稱交
戴東原傳其九數之學趙甌北蔣心餘皆未識莊谷
歐北寄詩曰平生未識孔巢父曾讀紅欄詩一編著
錄已登書畫冊才名爭慕孝廉船莊谷有颺冰詞集
心餘著院本十種成封寄云我所
度曲不可不令颺冰詞人見之

從姪柞索蘭

幽蘭似佳人不以色自炫忽慢度微風芳馨襲庭院緬懷
湘中君含情發深眷

乞君九畹英足我三益友晴窗午夢醒疏香暗消受何以
伴蹇修一卷離騷有

瓶鞠

一花如高人俯仰謝冠蓋一花如好女丰神流衣帶淡者
非枯槁濃者非粉黛高吟詩一章薄醉與之會

煙草詩千一百字

木名以時稱草名以月主變遷物生繁乃有煙名并核實
麗之名於義起乎事獨與燔蒸親質固異香祖燒之物爲
煙意趣不相伍遠自狄鞮來流傳徧中夏聞其初奏功厥

乃在軍旅縣軍營滇南瘴氣獨防禦遂致百年閒不遺一
處所灌溉勤輓轡藝植敵禾黍莖方含四稜虛中象福苣
幹直歧斯薺葉厚力乃聚圓橢肖甘蕉蠶龐類大芋秋老
亦作花蕩紅垂嫵乳絳華形同榎匙榮兼葦芡五出差差
尖白蒂微微俯潏潏浮風光油油見繁臚分種法秧田晚
力侔萊圃狀竟失稽含性未辨俞跗五疋高皮閣露書啟
端緒吁嗟芻豢悅謀之無厭數水產及鬻蛤陸羞徧蹶羽
效醉葉卷萋作辛醬糝蒟草根與土毛搜羅兼敗腐此更
出新意味外鹹酸苦保蟲遐裔外國真有厭火歎煙豈蚊
母食火豈駝父噓氣雲飄黷隱身霧結糾鑽截分竹木支
持代談塵鑄金置兩端五行相尅拒碧筒象鼻彎含蒟金
蓮炬下空無當卮外圓縣隔補人心巧取材絲絲其中貯

薪傳仗煤炰頃刻氛嫗煦兩儀鼓橐籥萬彙以氣取地動
躍龍機山崩應鐘鐻一氣所翕納不過分細巨吸之燄揚
赤吐之雲出岫涎自喉舌生力於鎮鎮鼓頰渥上頰顙熏
灼洽肺腑翳翳笑髭須竈窳借口輔息息自相通响响若
相語中忽歎長風勢厲氣載努亦有嗜奇人鼻觀能茹吐
亦有狡獪材連環戲媚嫵其美在初燃並可例以酒炎虐
之逼爍潯溼斯注下火盡膏中乾蒸翳聲煎煮力竭騰吹
灰液凝乃流滷餘氣最氤氲盤旋穴窗戶初食猶稍稍洎
茲盡率土流布起男子漸染及婦女旣上概衣冠亦下逮
童豎獻酬到賓朋搜求徧窮窶好不殊北南畜不遺僻阻
如影偕出入如食周寒暑如奕代寤言如僚忘喜怒或則
再三止或則日無數或相忘噉啜或沈酣酤醕或云擔不

歸溼寒力能去或云吐黃水肺焦病深鉅閒有疾憎者反
訝獨齟齬裝飾豔象犀點綴太醜護帟褰妙剪裁綵綬五
雜組時花及草蟲鍼神纖手撫零輓賸帛釦砌功幾許
鬪綺豔雲赧光華奕𠵽𠵽續紛各在腰鞞厲鰲燧屈左右
用咸宜陰陽儼分部更有擅祕藏別製摠機杼剗木作方
盤揉杞成圓筥有舟效枳桡覆幕法盃簋取潤煎錫罐避
賊置瓦甌取食喜頻頻不復分酉午曠日而費時那自知
其故人利競錐刀竟等米鹽普頓教些須值堆積成大賈
有明萬厯末漳泉法始著馬氏淡肉果雲布散六寓遷地
豈弗良任土聲名樹兼己別本顛土更判邾莒深厚宜肥
沃淡薄在烏鹵但能辨根莖不復論所處長竿葉挨排魚
鱗任風舉杲杲暴秋陽班班燦文繡柳牙渾斑爛楮葉多

酈駐溼以藤荳膏炒以醇酎醕易然假火硝閒色陳土苴
醃糟緊結束鏤劃細分縷鏟鉋深中央銛鏹安兩鑷推盪
反覆閒筋力費腰膂高艣大車箱絡繹越縣府攬載富兒
門名目臚廣簿市墟攢細人十十復五五圭撮易一錢睇
眎猶量估真令散如煙消耗兩手拊團團坐勸引此禮其
猶醪空已靡饑涎並未撐腸肚地力與人工銅帛與竹楮
其他細碎者更難以細譜虛糜億兆民潛匿爲大蠱古聖
重本源制器戒苦窳無益之作爲迺踰閑蕩矩嗜好日遷
新竟難返滄古一唱萬千應嘗試爭忤舞非可勢力遏非
可道德杜總在作俑人一扇變齊魯久竹化青甯圓穹意
楚楚腐儒欠變通憂杞色談虎聳肩作小詩用代方言補
李長庚字超人號西巖同安人乾隆辛卯武進士官至

浙江提督追封壯烈伯諡忠毅有詩文遺集

詩話西巖偉烈精忠爲水師第一名將而詩篇爛雅
有祭征虜雅歌投壺之風遺集罕觀僅於阮文達等
經室集中附見二詩文達贈詩原唱云儒將威名定
不虛風濤千里鎮儲胥海天飛礮親提鼓夜月揚帆
坐讀書造得戈船浮木梯築成京觀掣鯨魚封侯自
有黃金印射石將軍恐未如推挹至矣西巖和作神
凝氣斂絕無武夫囂矜之習可徵襟度

次韻酬阮雲臺撫軍

開府推心若谷虛要將民物納華胥風清海外除奸蠹令
肅軍中畏簡書報國自應親矢石酬知未盡掃鯨魚庸疏
何幸叨青眼媲美前賢愧不如

方昂字叔駒一字詡庵別號坳堂歷城人乾隆辛卯進
士刑部主事歷官江蘇布政使有坳堂詩集

游上方山

懸崖忽撒手寂歷道心生一榻低眉坐諸天合掌迎風簫
來梵唄仙磬識禽聲月印千潭水分明澈底清

崇文書院訪王夢樓同汎西子湖

唾綠流澌清泚泚明妝奩鏡窺西子絳衫紅袖書幃紗竹
外漁娃三兩家大羅天上探花使爪痕鴻雪聊棲止興來
綠蟻盈紅螺王郎拔劍檀郎夢樓歌者檀郎歌臨流漱齒齒爲冷
退隱湖山推管領我亦解組歸林邱神仙郭李欣同舟

吳山元妙觀訪黃含山道士

孤廬結煙靄一榻卧松筠之子何爲者荷蓑行負薪坐看
雲葉溼剗喜藥苗新靈雨蕭然下歸歟墊角巾

陳昌齊字賓臣號觀樓海康人乾隆辛卯進士改庶吉
士授編修歷官浙江溫處道有賜書堂集

詩話觀樓分巡溫處正海疆多事與提督李忠毅公
長庚合力防禦深相結納集中多酬唱之作當和忠
毅韻有句云定有高文傳經義轉疑孺子受鶻欺自
註謂匪未就擒文員與有責焉時有援順康間舊例
議禁民船出海者觀樓力阻之民頌其德觀樓博綜
羣籍戴東原校水經注觀樓指其訛東原為心折邵
二雲著爾雅正義觀樓駁正三十餘條為通人所推
挹類是其他辭證呂氏春秋淮南子楚詞皆有述作
又補經典釋文所未備別撰
附錄為祝融所攝未及重輯

寄馮魚山編修

敏昌

聞汝言愁亦欲愁茫茫身世費前籌負人自具將軍腹責
我難逃子羽頭未信華陰真有市何曾棘刺解成猴商量
一榻安心法那得人間聚窟洲

何處雞聲曉夢餘思量世事轉愁余彰身有具麒麟植抵
掌能談鸚鵡車人結塵緣難了卻強看勝境更紛如三千
白髮頻臨鏡二字行藏問碧虛

都中除夕

臘盡復春回，恩恩歲事催。論文猶有社，避債竟無臺。舌在誠何用，酒酣姑莫哀。田園蕪未了，好與賦歸來。

龔景瀚字海峯，閩縣人。乾隆辛卯進士，由知縣歷官蘭

州知府有澹靜齋詩鈔

詩話：海峯起家，收令所至皆有政聲。川湖陝教匪之亂，官軍追剿累年，不得要領。海峯屢參戎幕，建堅壁清野議，卒行其法，遂底蕩平。卓薦入覲，方將大用，遽以病歿。時論惜之。其詩不事雕飾，性真，激發衝口成章。弔古憫時，善達民隱。尤與元道州爲近。嘗題金文甫詩：「草云邇來詞壇少宗匠，豎子碌碌矜毛錐，冶容塗澤取媚悅，奄然無氣如居屍。」後生識見苦不卓，紛華悅眼爲所欺，亦足見其志尙矣。

延平懷古

青山蹀躞從西來，延平之城當其隈。危巒萬仞飛雉堞，高樓傑閣橫江開。大江日夜水東注，逆浪捲將山影去。峯迴

舟轉不見城雙塔亭亭鎖歸路建瓴勢扼八閩吭此地甯
曰非巖疆壯哉當年陳將軍百死不肯歸高皇吾聞有元
當季年兵戈滿眼妖氛纏鹽徒走卒皆起事平原白骨生
烽煙皇覺寺僧出淮右五載羣雄同授首將軍若使從中
原中山開平安足論甯爲雞口勿牛後丈夫固當自不朽
不然亦作元遺臣豈能俯首事他人湯公誅死廖公反將
軍若降亦不免扣舷我爲將軍歌江聲浩浩悲風多青山
綠水仍無恙孝陵松柏今如何

安慶謁余忠宣公墓

石人挑動黃河岸汝穎斬黃先作亂二十四郡無平原守
臣望風如鼠竄誰歟健者忠宣公孤城血戰波濤中江淮
蔽障豈敢必尺寸亦以完吾忠清水塘邊公死處血化爲

燐香入土墓門松柏風蕭蕭行人淚滴秋江雨同志惟聞
泰與李元室科名三人耳晚城何似石頭城千載甯爲袁
粲死太僕當年最有名可憐國史竟無成寺僧眞誤乃公
事白髮興朝聞履聲

卽事

山邑瘠而僻古不通舟車我來當四月斗米三百餘中家
力已殫貧者將何如有司急民隱力請開倉儲惻然語衆
民爲我待須與茲邑距大府迢迢千里途大吏坐堂皇幕
客省文書市區例供應朝夕進所需價廉米又鑿反斥斯
言誣有司默無策束手徒嗟吁貧民不敢怨忍飢對妻孥
新禾登尙早粒米眞如珠矯詔賑河內吾思汲長孺

過六盤山紀事

六盤昨夜雷雨作山東飛雨山西雹天公豈獨甚西民刻
盡田禾一何虐青者胡麻黃者麥蕎麥花開紅間白可憐
昨日異今朝敗穗殘花滿阡陌夏禾已熟不到口秋禾尙
弱更何有男嘯女哭向田中不望蒼天望父母長官清晨
巡所部走馬田間相勞苦回衙泣草告災書八羽星飛達
大府

正月六日安國鎮道中

積雪半遮山殘冰猶在地旭日射車窗盎然有暎意柳芽
苞欲放草色淡如睡青蔥未可言各各含生氣因思前夜
冷縮腳不成寐相去未經旬寒暄何太異物極勢必反陽
開本陰閔至此見天心因之悟人事今茲看長養暢暢羣
生遂寄語苦寒人慎勿怨憔悴

豫讓橋

漁洋山人古夫于亭雜錄謂讓從恩怨起見

橋邊水

非天理民彝之正故其題國士橋詩云國士

謂可以

敦薄余意晉尚有君讓非中行智氏之臣

特為知

已死耳不得以厲叔律之厲叔之言近對

亦非純

臣之議漁洋薄讓而取厲叔皆非也作此

正之

志士各有立處死焉能同當時百里奚亦不殉虞公況復

晉君在虛器擁宮中智氏非其主安得云効忠士為知己

死朋友理尚通榮枯不改節此事固足風若云君臣義天

地相始終甯論知不知報施說亦窮厲叔雖忼慨憤懣非

靖共一死良為難惜哉言不衷

九日登皋蘭山作

皋蘭山遠在焉支之西千餘里金城城外安有此

漢書匈奴傳霍

去病自焉支山千餘里始戰皋蘭是皋蘭在焉支之西

氏水經注疑以為今河州之石門山灘水入塞處也然猶

未敢定今乃以蘭州城隋人不學誤題名隋朝始誤以此外之山當之失其實矣

立蘭毛氏併州大類是隋人誤以屯氏河為毛氏河遂立毛州誤亦類此清秋九

日策馬來登高遠望亦雄哉是非往蹟何足問對此茫茫

且舉杯持螯飲酒歌慨慷置身如在青天上俯視秦川一

氣中萬里關河何莽蒼丈夫未得際風雲低頭矮屋日論

文祭酒書生封侯相功名何必三將軍蘭州城外有漢霍

漢之金城郡治允吾在今皋蘭之西百三十餘里與礪伯

平番交界處故金城為河西五郡之一今皋蘭縣乃漢之

金城縣屬於金四顧躊躇忽不樂滿目哀鴻在林薄時蘭

城郡非郡治也八州縣被災已費司農百萬錢諸君何以憂民瘼南望況

有櫓與槍洞庭兩岸紛屯營湖南苗匪湖北教匪猶未平時大兵方進攻黃河

之水滾滾從東去安得挽入湖湘洗甲兵

洪樸字素人號伯初歙縣人乾隆辛卯進士歷官順德

知府有伯初詩鈔

詩話伯初與其弟初堂少有二難之目年僅強仕生平著作多散佚存詩一卷乃視學湖北時所作伯初嘗言聲音之道與政通自古工爲詩者未有不善爲政者蓋自道其所得也

題王蓬心前輩司馬詩卷

鐙殘漏盡未停披一卷淋浪白傅詩獨坐渾忘通夜永
相看又是十年遲青衫江上人還健紅板聲中酒莫辭
最是長安行樂處紅牆銀漢起人思

題李畏吾烏巖圖

坐聽烏聲客自悲羸糧可悔出山時南州一檄猶堪喜
東閣重來獨較遲繞樹星稀憐夜永將雛頭白數歸期
天南嚙指何人痛華實根心本一枝

峽口聽雨

子規嗁咽打頭風十二巫山曲曲籠上峽雨從懸溜外極
天寒到暮雲中秋聲牢落高唐路客思淒迷蜀道叢等是
蕭蕭時節異江南煙侶問巴東

蓬心王丈爲繪阻風圖疊韻奉酬

雪浪霜濤寫不難琅玕贈我碧雲端夜來酒散憐肌熱夢
去江聲逼枕寒桑下風枝還一證畫中雲樹亦三歎離情
別緒君尤甚少日中書接鳳翰

常紀字銘勳號理齋承德人乾隆辛卯進士厯官崇慶
知州殉難贈道銜有愛吟草

宿鳳縣戲爲一絕句

鳳州三絕惟餘柳奈此依依綠樹何攀折恨無纖手贈空
沽村酒對婆娑

楊懋珩字桐石江西清江人乾隆辛卯進士官平樂知

縣有傳硯堂詩存

詩話桐石年十三四卽嗜吟詠日成詩數十
首長益磅礴粵衍爭奇關捷晚歲漸近自然

蘭溪曉發

晴江沙白樹霏微衰草荒原露未晞
永夜灘聲連野碓凌晨山色破晴暉
竿頭風急檣烏轉浦口雲深塞雁飛
遠道星霜驚屢易客程猶傍釣魚磯

補松歌爲余澹泉賦

濤聲萬壑喧晴宇虧蔽日月拏龍虎
一朝朽骨忽摧藏劈破青天半飛去
老龍訴天天帝怒下遣公來作松主
夢入神山謁天姥五色嫋嫋道旁土
去天一握呼龍語醒來小試補天手
百里青松一時補誰種湘源十萬松
馬氏當時

據全楚蒼髯翠鬣一千年雪壓風饕不知數自從桂父海
山游神物翻憐困童豎嶧陽孤桐焚野火岱嶽五松縱樵
斧秦碑豈惟牛礪角晉塔曾教經作礎世間吁怪何事無
有道髡黥無罪虜高冠藉足玉抵鵲鳳凰菹醢麒麟脯鳴
呼豈獨汝松淚如雨我公桂嶺停鸞驂罷採丹砂窺岫屢
竭來見松向松歎奔走諸龍手親撫搜巖剔穴萬取千補
缺拾遺十得五頓令壯觀還山川直遣花封作園圃閭閻
那更有飢寒公視松如視編戶我披補松圖有語茹復吐
安得如公十數輩布列區夏箴輦暫雖無罅漏待彌縫或
者明堂需藻黼卽今四十尙山城齷齪甯甘曾等伍東京
大樹重馮公南國甘棠留召父君看清蔭午漸繁誰識良
工心獨苦我爲松歌松起舞春風吹作花千樹公與此松

同萬古

晚晴移詩匯卷九十四終